

欽定新疆識畧卷二

北路輿圖

謹按漢書西域傳稱山北六國後漢書又稱車師

六國六國者車師前後部及卑陸且彌蒲類移支

卽今之巴里坤烏魯木齊也其西爲烏孫其北爲

匈奴五單于地卽今之伊犁塔爾巴哈台也乾隆

二十二年平準部定新疆北路分建城邑伊犁之

城九烏魯木齊爲腹地立郡縣設屯堡尤多其都

統所駐曰鞏寧城乾隆三十年建提督所駐曰迪化城

乾隆三十年建鞏寧東北路城堡十有四曰惠徠堡爲六

913
3606
3

道灣中營屯曰屢豐堡為七道灣中營屯曰輯懷

城為古牧地中營屯以上三處皆乾隆二十七年建曰阜康城為

阜康縣治乾隆二十年建曰三台堡在濟木薩三台乾隆

四十二年建曰育昌堡在雙岔河曰時和堡在柳樹溝

以上二處皆乾隆三十六年建曰愷安城為濟木薩縣丞治乾隆三十

七年建曰堡惠城為濟木薩叅將所駐乾隆四十年建曰

孚遠城為古城領隊大臣所駐乾隆四十年建曰靖遠城

為奇台縣治乾隆四十年建曰木壘城為守備所駐乾隆

三十二年建三曰會寧城為巴里坤領隊大臣所駐

乾隆三十年建七曰鎮西府城為鎮西府治西路城堡亦

十有四曰宣仁堡為中營頭工曰懷義堡為中營

二工曰樂全堡為中營三工曰寶昌堡為中營四

工以上四處皆乾隆二十七年建曰頭屯所堡為千總所駐乾隆四十年

二年建曰寧邊城為昌吉縣治乾隆二十年建曰景化城

為呼圖壁巡檢治乾隆二十年建曰蘆草溝堡為千總

所駐曰塔西河堡為千總所駐曰康吉城為綏來

縣治曰綏寧城為瑪納斯右營都司所駐以上四處皆乾隆

四十年建曰靖遠關為邊城乾隆四十年建曰慶綏城為

庫爾喀喇烏蘇領隊大臣所駐曰安阜城為精河

糧員所駐以上二處皆乾隆四十八年建綏來縣庫爾喀喇烏蘇之間尚有綏來遂成豐

潤三堡係屯兵自築不在官建之數南路城一曰嘉德城爲喀喇巴

爾噶遜守備所駐乾隆四十七年建又吐魯番領隊大臣所駐曰廣安城乾隆四

十六年建闢展巡檢所治曰闢展城乾隆四十四年建亦烏魯木齊所屬以在南路故不具載

塔爾巴哈台亦建城曰綏靖握其形勢總其會歸

誠可謂星羅碁布矣夫通道始於張騫而不能得

月氏要領求馬繼以廣利而不能下小國堅城漢

之於西域勤天下之力以務之卒有輪臺之悔故

班固之論以爲得之不爲益棄之不爲損若我

朝則上順天心下因人事其得之也不爲黷武其守

之也不爲費財伊犁烏魯木齊之駐防滿兵則移

自熱河西安涼州莊浪駐防綠營兵則移自延綏
寧夏興漢西寧固原肅州河州安西以邊外屹然
重鎮而皆裁內地之額以補之實未嘗增兵也至
其籌餉也甘肅等處所減草料及京口杭州等處
出旗漢軍俸餉口糧馬乾折色等項每歲節省銀
一百二十九萬兩有餘以一百零七萬八千四百
餘兩爲新疆各城之俸廉經費尙餘銀二十一萬
一千五百餘兩是得新疆不特未嘗糜餉且爲節
省帑銀也加以大興屯田設立學校閭閻相望比
戶可封阡陌縱橫餘糧栖畝是又自古建堡塞之

議講安邊之論者所不能得十一於千百者矣謹
繪北路總圖一其分圖五曰巴里坤曰古城曰烏
魯木齊曰庫爾喀喇烏蘇曰塔爾巴哈台伊犁則
各自爲卷故不複載

圖總路



平定北路紀事

準噶爾者本元阿魯台部其聲訛爲厄魯特
國初時其酋嘗遣使通貢後有噶爾丹者出自北厄
魯特漸強盛自立爲汗侵掠其鄰喀爾喀部喀爾
喀故有二汗左翼號圖謝圖汗右翼號車臣汗其
地在我四十九旗蒙古之北與準噶爾接壤至是
爲所侵擾勢不支康熙二十七年二汗率全部來
歸並不敢游牧於故地避入我邊境二十九年尙
書阿爾尼率兵備邊會厄魯特驅掠喀爾喀人畜
過阿爾尼以蒙古兵擊之而令喀爾喀奪還所掠

喀爾喀務爭取陣遂亂厄魯特因而乘之反爲所
敗乃以裕親王福全爲撫遠大將軍恭親王常寧
爲安北大將軍出師至烏蘭布通大敗其衆噶爾
丹始以書來乞和然弗悛也其兄子策旺阿拉布
坦亦爲所凌虐嘗遣間使來附我使者往爲厄魯
特所害三十三年約其來會盟不報而擾喀爾喀
益甚

聖祖仁皇帝念喀爾喀爲我外藩不庇之使安游牧勢將
以近邊蒙古地處之則蒙古生計亦受害自非大
創噶爾丹不可乃決計用兵又恐我兵至而敵先

遁也三十四年圖謝圖親王沙津來覲於木蘭具
言噶爾丹約其爲內應將入邊

聖祖仁皇帝命沙津僞與相結誘其兵來是秋噶爾丹果
掠喀爾喀之納木札爾陀音所部駐兵於土喇及
克魯倫河之間自秋徂冬不去三十五年春兩路
出師

聖駕向克魯倫河進發撫遠大將軍伯費揚古率將軍孫
思克總兵康調元等向土喇進發五月五日大兵
至克魯倫河噶爾丹已遁追之不及

聖駕回鑾費揚古兵至昭莫多探知噶爾丹在特勒克濟

相距僅二十里遣碩岱誘之孫思克陣東阜康調
元陣西阜以待賊果大至我軍擊之自未至西噶
爾丹大敗追殺四十餘里斬數千級生擒數百人
牛三萬餘羊四萬餘軍資器械無算噶爾丹之妻
阿奴喀通亦死於亂軍其他台吉宰桑陣歿者不
可數計投費揚古軍者二千餘人投馬思喀軍者
五百餘人噶爾丹旣敗與諸台吉會於塔米爾噶
爾丹欲往翁金丹濟喇欲往阿爾台阿賴卜灘及
丹津俄木布欲往俄羅斯邊境皆無定議己而丹
津俄木布之人盜噶爾丹部內羊馬噶爾丹責之

遂有隙丹津俄木布叛去惟丹濟喇及阿賴卜灘
尙隨之又有諾顏格隆及吳爾占札卜等亦率其
屬以從然所屬各不過千人少僅數百人

聖祖仁皇帝欲乘勢遂滅之秋九月

聖駕再發京師往歸化城經理其事檄諭青海諸台吉協
擒噶爾丹諭策妄阿拉布坦亦如之又多遣間使
招其黨與時翁金有我軍所餘糧噶爾丹欲資以
度冬使丹濟喇來劫我副都統祖良璧敗之其遣
往達賴喇嘛之使人喇克巴過青海亦爲我副都
統阿南達所擒有台吉阿玉奇及厄爾克巴圖皆

欽定新編詩畧 卷二
承檄與策妄阿拉布坦會於阿爾台約共擒噶爾丹噶爾丹聞之遂向白格爾西去十二月

聖駕回京三十六年春噶爾丹之子塞卜騰巴爾珠爾捕獸於巴爾思庫爾我哈密回目都拉達爾罕遣子郭帕擊擒之俘送京師二月

聖駕啟鑾往寧夏時噶爾丹竄於薩克薩呼里克資野獸以給勢益蹙諸台吉咸出怨言噶爾丹於三月十三日仰藥死丹濟喇攜其屍及其女鍾濟海來降聖祖仁皇帝以噶爾丹餘衆畀策妄阿拉布坦無何狼子野心漸狂悖康熙五十四年來擾哈密我駐防哈

密之遊擊潘至善拒之肅州總兵路振聲出兵應
援敵始去自是常發兵備邊五十六年以內大臣
傅爾丹爲振武將軍駐阿爾台尙書富寧安爲靖
逆將軍駐巴里坤散秩大臣祁里德爲協理將軍
在西路策應是年冬策妄阿拉布坦遣大策零敦
多卜侵西藏藏中酋長曰拉藏汗與達賴喇嘛及
班禪厄爾得尼退守布達賴五十七年侍衛色楞
率西寧兵會同青海王台吉等進援總督額倫特
繼之未至而拉藏汗已爲敵所殺額倫特敗賊於
齊諾郭勒色楞敗賊於喀喇烏蘇尋合兵進勦八

月朔日賊大至額倫特中槍殞我師敗績於是皇子允禩爲撫遠大將軍率重兵駐西寧五十八年平逆將軍延信由青海定西將軍噶爾弼由打箭爐兩路進兵收復藏地傅爾丹富寧安祁里德等亦由西北兩路襲擊以分賊勢富寧安在闕展降回衆三百餘至吐魯番降番衆千餘祁里德亦降厄魯特宰桑塞卜騰等二千餘傅爾丹至格爾額爾格殺厄魯特二百餘擒宰桑貝肯等百餘然皆未深入也八月延信兵與大策零敦多卜戰於密諾郭勒綽瑪喇等處皆捷噶爾弼由南路乘虛入